



Reglur um innritun og dvöl barna í leikskólum Kópavogs.

Mnr: 1208715

Leikskólinn er fyrsta skólastigið í menntakerfinu. Börn eiga rétt á leikskóladvöl óski foreldrar þess. Leikskólinn er því á forsendum barnsins, en leitast er við að hafa sem mestan sveigjanleika í dvalartíma barnanna til að koma til móts við óskir foreldra. Grundvallaratriði er þó að það komi ekki niður á börnunum og leikskólamenntun þeirra.

Umsókn:

- Sækja þarf um leikskóladvöl fyrir barn, sem þá skráist á biðlista eftir aldri þess. Sótt er um á vef <http://www.kopavogur.is/>
- Skilyrði fyrir leikskóladvöl er að barn eigi lögheimili í Kópavogi, en barnið getur verið á biðlista þó lögheimili sé annars staðar.

Forgangur:

- Börn geta fengið forgang, skv. úrskurði leikskólafulltrúa, vegna fötlunar eða félagslegra aðstæðna/erfiðleika sem ætla megi að hafi áhrif á velferð barnsins. Beiðni um forgang þarf að fylgja bréf frá félagsráðgjafa, lækni eða öðrum eftir því sem við á.
- Börn leikskólakennara, annarra uppeldismenntaðra starfsmanna og leiðbeinenda, sem starfa í leikskólum Kópavogs, svo fremi leikskólastjóri mæli með forgangnum. Láti starfsmaðurinn af störfum áður en komið er að barni hans á biðlista, missir barnið forgangsrýmið og hættir um leið og starfsmaðurinn.
- Börn sem eiga systkini í umsóknarleikskóla fá forgang í viðkomandi leikskóla svo framarlega sem þeim börnum sem eru fyrir framan þau á biðlista býðst rými í öðrum þeim leikskólum sem forráðamenn setja til vara.

Dvalargjald:

Dvalargjöld reiknast skv. gildandi gjaldskrá.

Einstæðir foreldrar, öryrkjar með metna örorku 75% eða meira og námsmenn þar sem báðir foreldrar eru í fullu námi greiða lægra gjald. Einstæðir foreldrar og öryrkjar framvísa vottorði þegar dvalarsamningur er útfylltur. Námsmenn framvísa vottorði um námsframvindu eftir hverja önn.

Einstæðir foreldrar þurfa að skila inn undirritaðri umsókn til leikskólastjóra árlega fyrir 15.

september um að greiða lægra gjald. Hafi umsókn ekki borist fyrir þann tíma hækkar gjaldið. Ekki er veittur afsláttur afturvirkur. Eigi foreldrar sama lögheimili greiða þeir óbreytt gjald.

Almennt reiknast gjald á það foreldri sem barnið á lögheimili hjá. Óski einstæðir foreldrar eftir breytingu á því þurfa þeir báðir að undirrita beiðnina.

Systkinaafsláttur er veittur sbr. gildandi gjaldskrá.

Foreldrum ber að tilkynna um breytta stöðu sem hefur áhrif á greiðslu dvalargjalds.

Kópavogsbær leggur áherslu á að barn dvelji einungis í einum leikskóla á hverjum tíma, enda í samræmi við markmið um velferð þess. Kópavogsbær greiðir ekki fyrir barn sem dvelur í leikskóla í öðru sveitarfélagi samtímis því að halda rými í Kópavogi

Innritun:

Börn raðast á biðlista eftir aldri og sérstakur biðlisti er fyrir hvern leikskóla. Foreldrar merkja við einn leikskóla sem aðalumsókn og allt að tvo til vara. Einnig er hægt að merkja við „hvaða leikskóla sem er“. Börnum er almennt einungis boðin dvöl í þeim leikskólum sem sótt er um, nema foreldri merki við „hvaða leikskóla sem er“.

Röð á biðlista ræður hver er næstur inn, en ýmislegt t.d. forgangur eða að einungis er laust rými fyrir ákveðinn aldur eða dvalartíma, getur haft áhrif.

Taki foreldri dvöl fyrir barn sitt í öðrum leikskóla en það óskaði eftir fær það að jafnaði ekki flutning í leikskóla í aðalvali fyrr en í upphafi næsta skólaárs.

Leitast er við að börn fái dvöl í sínu skólahverfi og reynt skal að úthluta börnum á 2. aldursári dvöl í þeim leikskólum sem hafa bestu aðstæðurnar til að taka við ungum börnum. Eldri börnum á biðlista sé þá boðin dvöl annarsstaðar.

Dvöl:

Leikskólarnir eru opnaðir kl. 7.30 árdegis og lokaðir kl. 17.30 síðdegis. Daglegur dvalartími stendur á heilli eða hálfri klst., og heimilt er að skipta hálfri klst. í 2x15 mínútur. Ef að hausti er ekki óskað eftir dvöl fyrir fleiri en 3 börn í byrjun og/eða enda dags, er heimilt að hafa skólann lokaðan sem því nemur. Gildir sú ákvörðun leikskólaárið. Hvert barn hefur ákveðinn dvalartíma dag hvern, 4-9 stundir. Skal við það miðað að börn komi og fari innan dvalartíma.

Öll börn taka þátt í þeim máltíðum sem falla innan dvalartíma þeirra.

Óski foreldrar eftir breytingu á dvalartíma metur leikskólastjóri hvort og hvenær hægt sé að verða við óskinni. Breyting á dvalartíma miðast við mánaðarmót, en sé gerð undantekning og dvalartíma breytt á öðrum tíma er greiðsla fyrir viðbót námundud að mánaðarmótum. Meginreglan er sú að umsóknarröð um lengingu gildir, en leikskólastjórum er heimilt að taka tillit til aðstæðna barnsins/foreldra, aðstæðna á deildum og aldurs barna. Búi foreldrar ekki saman hefur það foreldri sem barnið á lögheimili hjá heimild til að velja leikskóla.

Ef foreldrar óska eftir tímabundinni, fyrirfram ákveðinni styttingu á dvalartíma t.d. vegna fæðingarorlofs, eða atvinnumissis, er orðið við þeirri beiðni, og foreldrum jafnframt tryggð lenging í upprunalegan dvalartíma þegar starf hefst að nýju.

Ef um sérstakar óskir foreldra er að ræða skoðar leikskólastjóri þær sérstaklega og metur hvort hægt er að verða við þeim. Leikskólastjóri tekur tillit til aðstæðna á deildinni s.s. barnahópsins, fjölda dvalarstunda, barngilda og starfsmanna sem fyrir eru á deildinni, aldurs barnsins, tengsla þessi við önnur börn og starfsmenn, fjölda barna í hádegi og fl. Dvalargjald reiknast þá hlutfallslega. Nám barna og vellíðan er alltaf forgangsatriði.

Uppsagnarfrestur:

Gagnkvæmur uppsagnarfrestur er einn mánuður og miðast við fyrsta eða fimmtánda dag hvers mánaðar. Skuldi foreldrar þrjá mánuði er barninu sagt upp leikskóladvöl.

Samkomulag milli bæjarfélaga á höfuðborgarsvæðinu kveður á um að börnum sem flytja milli sveitarfélaganna sé heimilt að dvelja áfram í leikskóla í því bæjarfélagi sem flutt er úr í allt að tólf mánuði frá flutningi lögheimilis. Sé barn á lokaári í leikskóla eða það er fatlað og sú þjónusta sem það þarf á að halda er ekki til staðar í nýja bæjarfélaginu geta tímamörk verið rýmri. Nýja bæjarfélagið greiðir kostnað við leikskóladvöl barnsins skv. viðkomandi gjaldskrá.

Samþykkt í Leikskólanefnd Kópavogs 15. janúar 2013. Samþykkt í bæjarstjórn 22. janúar 2013.